## 0.0.1 sammasanasuttam

- 1. evam me sutam: ekam samayam bhagavā kurūsu viharati kammāsadammam nāma kurūnam nigamo. tatra kho bhagavā bhikkhū āmantesi bhikkhavo'ti. bhadante'ti te bhikkhū bhagavato paccassosum. bhagavā etadavoca:
- 2. sammasatha no tumhe bhikkhave, antarā sammasananti¹? evam vutte aññataro bhikkhu bhagavantam etadavoca: aham kho bhante, sammasāmi antarā sammasananti. yathā katham pana tvam bhikkhu, sammasasi antarā sammasananti? atha kho so bhikkhu vyākāsi. yathā so bhikkhu vyākāsi, na so bhikkhu bhagavato cittam ārādhesi.
- 3. evam vutte āyasmā ānando bhagavantam etadavoca: etassa bhagavā kālo, etassa sugata kālo, yam bhagavā antarā sammasanam bhāseyya, bhagavato sutvā bhikkhū dhāressantī'ti. tenahānanda sunātha, sādhukam manasikarotha, bhāsissāmī'ti. evam bhante'ti kho te bhikkhū bhagavato paccassosum. bhagavā etadavoca:
- **4.** idha bhikkhave, bhikkhu sammasamāno sammasati antarā sammasanam. yam kho idam anekavidham nānappakārakam dukkham loke uppajjati jarāmaraṇam. idam nu kho² dukkham kinnidānam kim samudayam

<sup>&</sup>lt;sup>1</sup>antaraṃ sammasanti - machasaṃ, pts.

<sup>&</sup>lt;sup>2</sup>idam kho - machasam, pts.

kiñjātikam kimpabhavam, kismim sati jarāmaraṇam hoti, kismim asati jarāmaraṇam na hotī'ti. so sammasamāno evam pajānāti: yam kho idam anekavidham nānāppakārakam dukkham loke uppajjati jarāmaraṇam, idam kho dukkham upadhinidānam upadhisamudayam upadhijātikam upadhipabhavam, upadhismim sati jarāmaraṇam hoti, upadhismim asati jarāmaraṇam na hotī'ti. so jarāmaraṇañca pajānāti, jarāmaraṇasamudayañca pajānāti, jarāmaraṇanirodhañca pajānāti. yā ca jarāmaraṇanirodhasāruppagāminī paṭipadā, tañca pajānāti. tathā paṭipanno ca hoti anudhammacārī. ayam vuccati bhikkhave, bhikkhu sabbaso sammā dukkhakkhayāya paṭipanno jarāmaraṇanirodhāya.

- 5. athāparaṃ sammasamāno sammasati antarā sammasanaṃ. upadhi panāyaṃ kinnidāno kiṃ samudayo kiñjātiko kimpabhavo, kismiṃ sati upadhi hoti, kismiṃ asati upadhi na hotī'ti. so sammasamāno evaṃ pajānāti, upadhi taṇhānidāno, taṇhāsamudayo, taṇhājātiko, taṇhāpabhavo, taṇhāya sati upadhi hoti, taṇhāya asati upadhi na hotī'ti. so upadhiñca pajānāti, upadhisamudayañca pajānāti, upadhinirodhañca pajānāti, yā ca upadhinirodhasāruppagāminī paṭipadā, tañca pajānāti. tathā paṭipanno ca hoti anudhammacārī. ayaṃ vuccati bhikkhave, bhikkhu sabbaso sammā dukkhakkhayāya patipanno upadhinirodhāya.
- **6.** athāparaṃ sammasamāno sammasati antarā sammasanaṃ, taṇhā panāyaṃ kattha uppajjamānā uppajjati, kattha nivisamānā nivisatī'ti. so sammasamāno

evam pajānāti³: yam kho kiñci loke⁴ piyarūpam sātarūpam, etthesā taṇhā uppajjamānā uppajjati, ettha nivisamānā nivisati. kiñca loke piyarūpam sātarūpam? cakkhum loke piyarūpam sātarūpam, etthesā taṇhā uppajjamānā uppajjati, ettha nivisamānā nivisati. sotam loke piyarūpam sātarūpam, etthesā taṇhā uppajjamānā uppajjati, ettha nivisamānā nivisati. ghāṇam loke piyarūpam sātarūpam, etthesā taṇhā uppajjamānā uppajjati, ettha nivisamānā nivisati. jivhā loke piyarūpam sātarūpam, etthesā taṇhā uppajjamānā uppajjati, ettha nivisamānā nivisati. kāyo loke piyarūpam sātarūpam, etthesā taṇhā uppajjamānā uppajjati, ettha nivisamānā nivisati. mano loke piyarūpam sātarūpam, etthesā taṇhā uppajjamānā uppajjati, ettha nivisamānā nivisati.

7. ye hi ke ci bhikkhave, atītamaddhānam samaṇā vā brāhmaṇā vā yam loke piyarūpam sātarūpam, tam niccato addakhum, sukhato addakhum, attato addakhum, ārogyato addakhum, khemato addakhum, te tanham vaḍḍhesum. ye tanham vaḍḍhesum, te upadhim vaḍḍhesum. ye upadhim vaḍḍhesum, te dukham vaḍḍhesum. ye dukham vaḍḍhesum, te na parimucciṃsu jātiyā jarāmaranena sokehi paridevehi dukhehi domanassehi upāyāsehi, na parimucciṃsu dukhasmā'ti vadāmi.

 $^3$ jānāti - machasam, syā.

<sup>&</sup>lt;sup>4</sup>yam kho loke - machasam, syā.

- 8. yepi hi ke ci<sup>5</sup> bhikkhave, anāgatamaddhānaṃ samaṇā vā brāhmaṇā vā yaṃ loke piyarūpaṃ sātarūpaṃ, taṃ niccato dakkhinti<sup>6</sup>, sukhato dakkhinti. attato dakkhinti, ārogyato dakkhinti, khemato dakkhinti, te taṇhaṃ vaḍḍhessanti<sup>7</sup>. ye taṇhaṃ vaḍḍhessanti, te dukkhaṃ vaḍḍhessanti. te na parimuccissanti jātiyā jarāmaraṇena sokehi paridevehi dukkhehi domanassehi upāyāsehi. na parimuccissanti dukkhasmā'ti vadāmi.
- 9. yepi hi keci bhikkhave, etarahi samaṇā vā brāhmaṇā vā yaṃ loke piyarūpaṃ sātarūpaṃ, taṃ niccato passanti, sukhato passanti, attato passanti, ārogyato passanti, khemato passanti, te taṇhaṃ vaḍḍhenti, ye taṇhaṃ vaḍḍhenti, te upadhiṃ vaḍḍhenti. ye upadhiṃ vaḍḍhenti, te dukkhaṃ vaḍḍhenti. ye dukkhaṃ vaḍḍhenti. te na parimuccanti. jātiyā jarāmaraṇena sokehi paridevehi dukkhehi domanassehi upāyāsehi na parimuccanti dukkhasmā'ti vadāmi.
- 10. seyyathāpi bhikkhave, āpānīyakaṃso<sup>8</sup> vaṇṇasampanno gandhasampanno rasasampanno, so ca kho visena saṃsaṭṭho. atha puriso āgaccheyya ghammāhitatto ghammapareto kilanto tasito pipāsito. tamenaṃ evaṃ vadeyyuṃ: ayaṃ te ambho purisa, āpānīyakaṃso vaṇṇasampanno gandhasampanno rasasampanno, so

<sup>&</sup>lt;sup>5</sup>ye hi ke ci - sīmu.

<sup>&</sup>lt;sup>6</sup>dakkhissanti - macham syā.

<sup>&</sup>lt;sup>7</sup>vaḍḍhassanti - machasaṃ

<sup>&</sup>lt;sup>8</sup>āpānīyakaṃso - syā, pts

ca kho visena saṃsaṭṭho, sace ākaṅkhasi piva<sup>9</sup>. pivato hi kho taṃ chādissati<sup>10</sup> vaṇṇenapi gandhenapi rasenapi. pītvā<sup>11</sup> ca pana tatonidānaṃ maraṇaṃ vā nigacchasi, maraṇamattaṃ vā dukkha'nti. so taṃ pānīyakaṃsaṃ sahasā apaṭisaṅkhā piveyya, na paṭinissajjeyya so tatonidānaṃ maraṇaṃ vā nigaccheyya, maraṇamattaṃ vā dukkhaṃ.

- 11. evameva kho bhikkhave, ye hi ke ci atītamaddhānam samaṇā vā brāhmaṇā vā yam loke piyarūpam sātarūpam, tam niccato addakkhum, sukhato addakkhum, attato addakkhum, ārogyato addakkhum, khemato addakkhum. te tanham vaḍdheyyum. ye tanham vaḍdhesum, te upadhim vaḍdhesum. ye upadhim vaḍdhesum, te dukkham vaḍdhesum. ye dukkham vaḍdhesum. te na parimucciṃsu jātiyā jarāmaranena sokehi paridevehi dukkhehi domanassehi upāyāsehi. na parimucciṃsu dukkhasmā'ti vadāmi.
- 12. yepi hi ke ci<sup>12</sup> bhikkhave, anāgatamaddhānaṃ samaṇā vā brāhmaṇā vā yaṃ loke piyarūpaṃ sātarūpaṃ, taṃ niccato dakkhinti<sup>13</sup>, sukhato dakkhinti. attato dakkhinti, ārogyato dakkhinti, khemato dakkhinti, te taṇhaṃ vaḍḍhessanti<sup>14</sup>. ye taṇhaṃ vaḍḍhessanti,

<sup>&</sup>lt;sup>9</sup>pivasi - sīmu, pibeyyāsi - sī2.

<sup>&</sup>lt;sup>10</sup>chādessati - sīmu, machasam.

<sup>&</sup>lt;sup>11</sup>pivitvā - sīmu. machasam, syā, sī2.

<sup>&</sup>lt;sup>12</sup>ye hi ke ci - sīmu.

<sup>&</sup>lt;sup>13</sup>dakkhissanti - machaṃ syā.

<sup>&</sup>lt;sup>14</sup>vaddhassanti - machasam

te dukkham vaddhessanti. te na parimuccissanti jātiyā jarāmaraņena sokehi paridevehi dukkhehi domanassehi upāyāsehi. na parimuccissanti dukkhasmā'ti vadāmi.

- 13. yepi hi keci bhikkhave, etarahi samaṇā vā brāhmaṇā vā yaṃ loke piyarūpaṃ sātarūpaṃ, taṃ niccato passanti, sukhato passanti, attato passanti, ārogyato passanti, khemato passanti, te taṇhaṃ vaḍḍhenti, ye taṇhaṃ vaḍḍhenti, te upadhiṃ vaḍḍhenti. ye upadhiṃ vaḍḍhenti, te dukkhaṃ vaḍḍhenti. ye dukkhaṃ vaḍḍhenti. te na parimuccanti. jātiyā jarāmaraṇena sokehi paridevehi dukkhehi domanassehi upāyāsehi na parimuccanti dukkhasmā'ti vadāmi.
- 14. ye ca kho ke ci bhikkhave, atītamaddhānam samanā vā brāhmanā vā yam loke piyarūpam sātarūpam, tam aniccato addakhum, dukkhato addakhum, anattato addakhum, rogato addakhum, bhayato addakhum. te tanham pajahimsu. ye tanham pajahimsu, te upadhim pajahimsu. ye upadhim pajahimsu, te dukham pajahimsu. ye dukham pajahimsu, te parimuccimsu jātiyā jarāya maranena sokehi paridevehi dukhahi domanassehi upāyāsehi parimuccimsu dukhasmā'ti vadāmi.
- **15.** yepi hi ke ci bhikkhave, anāgatamaddhānam samaņā vā brāhmaņā vā yam loke piyarūpam sātarūpam, tam aniccato dakkhinti, dukkhato dakkhinti, anattato dakkhinti, rogato dakkhinti, bhayato dakkhinti.

te taṇhaṃ pajahissanti. ye taṇhaṃ pajahissanti, te dukkhaṃ pajahissanti. te na parimuccissanti jātiyā jarāmaraṇena sokehi paridevehi dukkhehi domanassehi upāyāsehi na parimuccissanti<sup>15</sup> dukkhasmā'ti vadāmi.

- 16. yepi hi ke ci bhikkhave, etarahi samaṇā vā brāhmaṇā vā yaṃ loko piyarūpaṃ sātarūpaṃ, taṃ aniccato passanti, dukkhato passanti, anattato passanti, rogato passanti, bhayato passanti. te taṇhaṃ pajahanti. ye taṇhaṃ pajahanti, te upadhiṃ pajahanti. ye upadhiṃ pajahanti, te dukkhaṃ pajahanti. ye dukkhaṃ pajahanti, te parimuccanti jātiyā jarāya maraṇena sokehi paridevehi dukkhehi domanassehi upāyāsehi, parimuccanti dukkhasmā'ti vadāmi.
- 17. seyyathāpi bhikkhave, āpānīyakaṃso vaṇṇasampanno gandhasampanno rasasampanno, so ca kho visena saṃsaṭṭho. atha puriso āgaccheyya ghammābhitatto ghammapareto kilanto tasito pipāsito tamenaṃ evaṃ vadeyyuṃ: ayaṃ te ambho purisa, āpānīyakaṃso vaṇṇasampanno gandhasampanno rasasampanno, so ca kho visena saṃsaṭṭho sace ākaṅkhasi piva, pivato hi kho taṃ chādissati vaṇṇenapi gandhenapi rasenapi. pītvā ca pana tatonidānaṃ maraṇaṃ vā nigacchasi, maraṇamattaṃ vā dukkha'nti. atha kho bhikkhave, tassa purisassa evamassa: sakkā kho me ayaṃ surāpipāsitā pānīyena vā vinetuṃ, dadhimaṇḍakena vā vine

<sup>&</sup>lt;sup>15</sup>parimuccanti - sīmu. syā.

tum, matthalonikāya<sup>16</sup> vā vinetum, lonasovīrakena vā vinetum. na tvevāham tam piveyyam, yam mama assa dīgharattam ahitāya dukkhāyā'ti. so tam āpānīyakamsam paṭisankhā na piveyya, paṭinissajjeyya. so tatonidānam na maranam vā nigaccheyya, maranamattam vā dukkham.

- 18. evameva kho bhikkhave, ye hi ke ci atītamaddhānam samaņā vā brāhmaņā vā yam loke piyarūpam sātarūpam, tam aniccato addakhum, dukkhato addakhum, anattato addakhum, rogato addakhum, bhayato addakhum. te tanhā pajahimsu. ye tanhā pajahimsu. te upadhim pajahimsu. ye upadhim pajahimsu. te dukkham pajahimsu. ye dukkham pajahimsu, te parimuccimsu jātiyā jarāya maranena sokehi paridevehi dukkhehi domanassehi upāyāsehi parimuccimsu dukhasmā'ti vadāmi.
- 19. yepi hi ke ci bhikkhave, anāgatamaddhānam samaņā vā brāhmaņā vā yam loke piyarūpam sātarūpam, tam aniccato dakkhinti, dukkhato dakkhinti, anattato dakkhinti, rogato dakkhinti, bhayato dakkhinti. te tanham pajahissanti. ye tanham pajahissanti, te dukkham pajahissanti. te na parimuccissanti jātiyā jarāmaranena sokehi paridevehi dukkhehi domanassehi upāyāsehi na parimuccissanti<sup>17</sup> dukkhasmā'ti vadāmi.

<sup>16</sup>bhatthalonikāya - machasam, matthalonikāya - syā, pts.

<sup>&</sup>lt;sup>17</sup>parimuccanti - sīmu. syā.

20. yepi hi ke ci bhikkhave, etarahi samaṇā vā brāhmaṇā vā yaṃ loko piyarūpaṃ sātarūpaṃ, taṃ aniccato passanti, dukkhato passanti, anattato passanti, rogato passanti, bhayato passanti. te taṇhaṃ pajahanti. ye taṇhaṃ pajahanti, te upadhiṃ pajahanti. ye upadhiṃ pajahanti, te dukkhaṃ pajahanti. ye dukkhaṃ pajahanti, te parimuccanti jātiyā jarāya maraṇena sokehi paridevehi dukkhehi domanassehi upāyāsehi, parimuccanti dukkhasmā'ti vadāmi.